

Ngoenzseng Mbouj Doengz Bingzciengz

□ Veiz Haijlanz / 韦海兰

“Gou roxnyinh daxmeh lij ndaej gyaeu lai bi, neix mboujdan dwg gij roxnyinh ndawsim gou, lij daj gij yiengh daxmeh ciengzseiz yawj ndaej ok. Bi’gvaq 8 nyied, raeuz daiq bohmeb bae henz haij youz, daxboh daxmeh cungj lij ndaej naengh ruz ok rog haij bae youzlangh, gwnz haij rumz gaenj langh hung, daxboh daxmeh dauqma le, ndangdaej mbouj miz saekdi saeh. Caiq gangj gou ciengzseiz daek haeuxngaiz hawj daxmeh, roxnyinh gij gwn daxmeh lij lumj gaxgonq ha, baenzlawz naeuz aenvih maranz gvaq cieng, bungz daengz mbat binghraq neix youq ranzmbanj ndwen baj couh bingh naek lone?” Gou nai bouxgvan, hix dwg gangj vah ndawsim.

“Vah dwg yienghneix gangj, hoeng ndwenngoenz bouxlaux couh-dwg yienghneix, ngoenz caeuq ngoenz mbouj doxdoengz ha!” Bouxgvan lij dwg yousim sebseb, mbouj rox baenzlawz guh cij ndei. Lwnh bae lwnh dauq, doeklaeng lij dwg gietdingh ciuq gij iugouz guekgya daeuj guh, mbouj comz vunzlai gvaq ngoenzseng, gag vunz ranz bonjfaenh gvaq couh ndaej lo.

Daihgya sim haemq dingh le, gwn haeuxcaeuz gvaq le gou caeuq bouxgvan byaij roen lienh ndangdaej. Sawqmwh, bouxgvan ciep ndaej aen denva gyagoeng dwk daeuj, gyagoeng hujdengdeng naeuz: “Daxmeh mwngz ngoenzcog mbouj gvaq ngoenzseng lo, sou bae doiq aen dangauh bae!” Hix mbouj gangj vihmaz couh gag ndaep soujgih lo. Bouxgvan baez dingq gyagoeng baenzneix gangj, mbouj gyaеuj mbouj rieng gig geizheih, lauheiq miz maz saeh mbouj deng, sikhaek daj denva bae cam dahnuegx.

Laxlawz dwg aenvih nuengxgo youq diegrog mbouj ndaej ma, gyagoeng gyabuz huj le cij gangj vah gik haenx. Rox gij laizyouz le, gou dauq daj denva hawj gyagoeng, gejnaeuz: “Daxboh, bineix hingzseiq caeuq doenghbaez mbouj doxdoengz, nuengxgo lauheiq naengh banci mbouj ancienz geijlai, wngdang lijgaij de cij deng.” Hoeng gangj bae gangj dauq,

gyagoeng couhdwg ngeix mbouj doeng, lij doiq gou naeuz: “Daxmeh gvaq ngoenzseng lwgmbwk cungj mbouj ma, gvaq ngoenzseng miz maz angqyangz caeuq heiqaingq! Mboujguenj ngoenz-cog sou guh maz doxgaiq ndeigwn, gou cungj mbouj maranz gwn haeux-caeuz!” Aiya, gou roxnyinh mbangj seiz bouxlaux hix lumj lwgnyez nei, baez fatheiq le mwngz gangj maz de cungj dingq mbouj haeuj rwz.

Ngoenzseng gyabuz daengz lo, hoeng daengx ranz vunz sim mbouj dingh, mbouj rox dang guh mbouj dang guh. “Dang guh couh guh! Gou mbouj saenq daxboh daxmeh caen baenzneix mbouj roxsoq!” Bouxgvan soqlaiz guh saeh mbouj haengj yupyup yawjyawj, yaek guh maz gangj guh couh guh.

Yienghneix daegnuengx bae cawx byaek, nuengxsimj nyaengq guh ceizbyaek, gou bae aeu dangauh ma, daeglan dahlan hix daiq lwg iq ma lo, bouxlaux dajgangj, lwgnyez guh’angq,

ndawranz sawqmwh yiengjfoedfoed, nauhyied dangqmaz. Gou yawjraen gyabuz yaep ndeu daeuq dah lanlaenj, yaep ndeu umj daeg lanlaenj guhmaij, gyagoeng naengh youq bangxhenz riunyumnyum yawj dwk, aiq gaenq lumz gij vah haemhlwenz de gangj gvaq lo. Seiz engq angqyangz dwg, daengx ranz bouxlaux lwgnyez gvaengz youq aen daiz cuengq dangauh haenx, sing hung ciengq “go ngoenz-seng”, yienznaeuz singdiuh sang daemq mbouj doxdoengz, hoeng bouxboux ndawsim angqyangz dox-doengz, gyabuz hix naj hai naj riu dwk boq lab mbaenj ndei, doeklaeng caezgya gwn dangauh ndaw bak ndawsim cungj diemzsubsub.

3 nyied 18 hauh, gienh saeh engq angqyangz cienz daeuj: Yihyen bauq hawj genjcaz cingzgvangq daeuj, gyabuz mbouj miz maz bingh naek! A, ndaek rin naek daenz youq ndawsim daengx ranz vunz dauqdaej ndaej doek roengz lo, caezgya geijlai sim’angq

ha! Bimoq dou couh ndaej comz haemq lai vunz daeuj hoh gyabuz gvaq ngoezseng la.

Dingjlingz daengz ngoenzneix, daengx guek mbouj miz engqlai vunz deng gij bingh sihgvanh feiyenz lo, gak dieg canghyw bae bang Huzbwz, hix ndaej maranz lo! Gou roxnyinh bineix seizcin miz di mbouj doxdoengz, hoeng de lij dwg byaij ndiengndieng lizbae lo, seizhah daeuj daengz lo.

(sat)



Eu Fwen Soengq Hawj Dangj

□ Vangz Civeij Cinz Lizciuh / 黄志伟 岑立秋

Ngoenzneix raeuz ndaejhoengq
Eu fwen soengq hawj dangj
Ngoenzneix raeuz sim sangj
Daeuj haenh gangj guekcoj

Daengngoenz doek roengz bo
Raeuz gangjgoj daengz haemh
Seizgan baeraemraem
Guekcoj caemh bienqvaa

Dangj gyaеz raeuz lwgminz
Ciengxlwenx ninz mbouj ndaek
Seizseiz yawj raeuz naek
Ndaw aek miz lwgminz

Dangj gyaеz raeuz lwgminz
Yinx raeuz byaij loh fouq
Vih duet mauh hoj gouq(gaeuq)
Hwnzngoenz youq ndawsim

Caen ndang daeuj daiqdaeuz
Aeu gohyoz ciengx ndaem
Lwgminz bouxboux gaen
Dingq guh caen demsou

Dangj yinx byaij loh fouq
Lwgminz bouxboux gaenx
Ciengx ndaem raeuz ndaej ngaenz
Gwn daenj ngoenz bienq ndei

Gwn imq youh daenj raeuj
Mbouj caiq you deng iek
Haucauh aeu doxgiet
Iet fwngz caez doxbang

Mbanjmbanj doeng goengloh
Hohhoh cungj doeng dienh
Siujganh aeu saedyienh
Guekcoj caez bienq yiengh

Lajmbanj ceiq ndaej goq
Rex hoj roengz lajmbanj
Bouxhak haeuj daengz ranz
Bang ra gwn bienq miz

Miz dangj daeuj bangcoh
Mbanj goj hix ndaej bienq
Doeng loh youh doeng dienh
Fuengbienh raeuz lwgminz

Mbouj dwg gou gangj gya
Lajmbanj ngoenzngoenz bienq
Diegyouq lumj diegsien
Bouxboux lienh daeuj youz

Gwn daenj raeuz bienq ndei
Sevei raeuz bienq vaiq
Baengh dangj dawz raeuz daiq
Simhai lumj vagut

Ngoenzneix raeuz ndaejhoengq
Eu fwen soengq hawj dangj
Raeuz lwgminz lajmbanj
Gaen dangj byaij baenaj

•Sawcuenhrael Lwgnyez•

Gij Golwgnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

dou daengx roengzdaeuj lo, dou ndwn youq dieghoengq naj moh, byaengq hung lwgda yawj Aulungzgeviz yaek guh maz.

De menhmenh byaij daengz baihnaj daizcae, buenq gungj hwet, veq geij go nywj, cim gij geh baihlaj daizcae. Ndang de ngeng youq henz, gig dwgrengz. De baenzneix hawj dou

roxnyinh gaenjcieng hwnjdaeuj lo, cungj doiqdaug song yamq, mbouj gamj oksing cij yawj ndwi.

Gou cangguh mbeihung, gizsaed gig lau, siengj daengz haxbaenh nyoh yiemyiemj yaek conh okdaeuj, lumj miz raq rumz ndwenlab daj baihlaeng bongj gvaqdaeuj nei. Din’gvaz gou yo youq baihlaeng, dinswix daemh youq

baihnaj, baenzneix ceiq bienh buet-deuz lo, saeklaeuq duz ngwz hung haenx youh bongh okdaeuj, gou cijaeu baez cienj giujdin, couh ndaej buet-deuz, baezneix gou couh mbouj rox lumj haxbaenh yienghhaenx gag boux vunz ndeu deng ce roengzdaeuj lo, saeh huk cij ndaej guh baez he, baez moq couh yaek gwn vei hung lo.

Aulungzgeviz ngaemgyaeuj yawj coh rinbanj geij baez, de mbouj gamj momqyawj. Gou caen lau duz ngwz hung haenx yaek bongh ok congh daeuj, haeb ndaeng de gaemz ndeu. Hoeng maz cungj mbouj fatseng ne, dinghrikrik, cij miz gij sing Ah Giuh dingzdingz duenhduenh sup mug ndwi.

(caengz sat)

“Hai ya! Danghnaeuz mbouj dwg gou bae yinx de gyaep gvaqdaeuj, baenzlawz ndaej rox gij rongz de couh youq baihlaj neix?” Ah Gunh nyaеuq giuzndaeng, ndiengq bak, caeuq Ah Veij doxceng.

“Suenq lo suenq lo, sou couh rox baenzneix gangj.” Gou naeuz, “Raen duzngwz couh buet lumj duznyaenma deng faexmbaenq moeb baez he nei, seizneix lij miz naj youq dangqnaj Aulungzgeviz gangjboq dem? Dangh-naeuz mbouj dwg gou——”

“Hi!”

Aulungzgeviz cienq gyaеuj dauqlaeng, aeu lwgfwngzyinx daengj youq gwnz naengbak “hi” sing he, dajduenh gij vah gou bae, hix hawj